

वैलिव ज्ञान करव

वेताल पच्चीसी : कथा सरित सागरुक अख हिस्सु

मूल लेखक : सोमदेव पँडित

Story - 25 (Last part of Frame Story)



अनुवाद : म.क.रैना, मुम्बई

वेताल पच्चीसी : कथा सरित सागरुक अख हिसु

मूल लेखक : सोमदेव पंडित

अंग्रीज्य अनुवाद : सी.एच.टावनी तु एन.एम.प्यंजर

कॉशुर अनुवाद : म.क.रैना, मुम्बई

वेताल पच्चीसी

तांत्रिक दरवेशु सुंद अंत

राजु त्रिविक्रमसेन वोत लाश ह्यथ दरवेश क्षांतिशीलस निश। दरवेश ओस बरगदु किस कुलिस तल बिहिथ तँस्य प्रारान। तँम्य ओस जँमीनस प्यठ अँडिजन हुंदि चूर सुत्य अख गोल दॉयरु बनोवमुत। पानु ओस तँथ्य दॉयिरस मंज बिहिथ। दॉयिरस अंदर ओस रतु सुत्य लिवुन करनु आमुत। दॉयिरस मंज ऑस्य कँह नँट्य यिम रतु सुत्य बँरिथ ऑस्य। गाश करनु खॉतरु ऑस्य दरवेशन इनसानु चर्बुचि बति बनाविमचु। बुथि ओस अँग्न दजान तु दरवेश ओस मंत्र परान।

राजु युथुय दरवेशस निश वोत, दरवेश वोथ थोद। बुथिस आयस रोमक। दोपुनस, 'बहोदुर राजु, च़े छय म्यानि खॉतरु स्व कॉम वँरमुच़ य्वसु नु कांह हैकि हे वँरिथ। लूख छि पोज़ वनान ज़ि च़े ह्यू रुत तु बहोदुर राजु छुनु बेयि कांह।'

यि वँनिथ वॉज दरवेशन राजु सुंदि फेकि प्यठ लाश तु थँवुन पथर। तमि पतु कोरुन तथ श्रान। सँदुर लॉजिनस तु पोशि मालु त्राविनस नॉल्य। नर्यन जंगन मोथुनस सूर। पानस वोलुन कफन, तु रूद मंत्र परान।

कँह काल गँछिथ अनुनोव तँम्य पनुनि यूग बलु सुत्य वेताल तु सु च़ाव लाशि अंदर। दरवेशन वँर तस ति पूजा। तमि पतु वोन दरवेशन राजस, 'राजु, त्वहि

छु येमिस वेतालस कुन दंडवत प्रणाम करुन, तिथु पौठ्य जि तुहुंघ आँठुवय अंग लगन जँमीनस सुत्य। तमि सुत्य गछि तुहुंदि मनुच मुराद पूर।

राज़न वोनस, 'मे छे नु पताह दंडवत प्रणाम किथु कँन्य छु यिवान करनु। अगर तोह्य मे अकि लटि हॉविव, बु करु तिथय पौठ्य।'

युथुय दरवेशन दंडवत प्रणाम कोर, राज़न न्युव तस तलवारि हुंदि अकी वारु सुत्य कलु चँटिथ। तमि पतु कँड राज़न तसुंद सीनु चँटिथ तसुंज वॉलिंज तु कँरुन स्व वेतालस अर्पन। च्चवापौर्य गँयि खुशी हुंजु क्रकु।

लाशि मंजु बिहिथ वेतालन वोन राज़ु त्रिविक्रमसेनस, 'राज़ु, येमि लूकु पतु मेली च़े विद्यादरन हुंजु राज़ुसी, खसु यि मक्कार दरवेश हॉसिल ओस यछान करुन। मे छुमय च़े स्यठाह तकलीफ द्युतमुत, मंग कँछा यि च़े ख्वश करी।

राज़न वोनस, 'चोन मे प्यठ ख्वश गछनुय छु मे क्युत स्यठाह। तमि पतु ति अगर च़ु यछान छुख जि बु गछु कँह मंगुन, तेलि छुस बु यि मंगान जि यिमु सारेय २४ कथु, यिमु च़े बु बोज़नोवुथस, बैयि चान्यन सवालन हुंघ जवाब, तु यि पुंचुहिम कथ, गछन सॉरिसुय दुनियिहस मंजु मँहशूर गछुन्य।' वेतालन वोनस, तथास्तु। यिमु च़ोवुह कथु तु तमि पतु यि पँतिम कथ, गछन 'वेताल पचीसी' नावु सुत्य सॉरिसुय दुनियिहस मंजु मँहशूर। युस इनसान यिमु कथु परि, तसुंघ पाफ गछन दूर।'

यि वँनिथ द्राव वेताल लाशि मंजु न्यबर तु गव वापस। अमि पतु सपुद भगवान शिव बाकुय दिवता ह्यथ राज़ु त्रिविक्रमसेनस ब्रोंठु कनि प्रकट। राज़न कोर तस प्रणाम। भगवान शिवन वोनस, 'बु छुस ख्वश च़े कोरुथन यि मक्कार दरवेश खत्म। मे ओसुमख च़ु अमी खॉतरु पौदु कोरमुत युथ च़ु तिमन असुरन हुंद नाश करख यिम वति डँल्यमुत्य छि। येमि पतु बनख च़ु विद्यादरन हुंद ति राज़ु तु

सारिवुय पतु रलख च्चु मे सुत्य।' यि वॅनिथ वॅर भगवान शिवन तस अजेय नावुच तलवार हवालु।

काँम म्वकुलॉविथ वोत राजु त्रिविक्रमसेन वापस पनुन शहर प्रतिष्ठान। लूकव बोजु तसंजु दॅलीलु तु गॅयि ख्वश। राजु रूद दॅय द्वहस भगवान शिवु संजु पूजा करान तु दान धर्म करान।

